



ÇA M' TROTE È L' TIÈSSE dispû sakants djoûs. "Ça", c' è-st-in rimâdje qui dji pinse awè lèyu i gn'a dèdjà, oufti, ène boune pounîye d' anêyes. Sêrîz capabe di m' dire d' èwouski ça poréve bèn m' rivnu ?

LI P'TIT TCHÈT.

Èle ayèsséve si p'tit tchtèt.
 Qué grand plêji à l' vîre
 Stitchî ossi profond s' dwèt
 Au d'dins dès pwèls èt d' leû ombrîre.

Èle muchéve, èsse à bondrwèt ?
 Sès bleûwes-ouy dzo sès paupîres.
 Blinkîne-t-i ? Vôrîz l' sawè ?
 Bèn oyi-da. Vos m' faut-i l' dîre ?

L' Tchèt a djèmit. L' a-dj' rêvé ?
 Todî èsse-t-i qu' il a blèfé
 Si fwârt qu' mi ça m' a-z-ènèrvé.

Èt, d' oyu s' rîre, dj' m' a dislachî.
 Dj' èstéve si tant èstchaufé
 Qu' è ddins s' norèt dj' a ratchî.

*

L' MOXHON.

Adon, l' djonne moxhon vèyant s' èvoler s'
 moman,
 L' chûvant dès ouy, s' djoke ène miète au
 bwârd dèl nichîye.
 Quî lî dît qui s' pout taper foû d' on lan
 Èt zoupler dins lès êrs sins pont fé d'
 comèdiye ?

Quî lî djôze tot bas, l' ècoradje èt l'
 chofèle?

A-t-i mauy douvièt sès pènes èt sès bèlès
 éles ?

I saît qu' il èst moxhon; l' vènt l' satche, l'
 vola volant.

(*î avoz r'trové Mussèt ?*)

*

L' ÈFANT.

L' èfant à pwinne vnu au monde, lès djins
 dèl famille
 Clapenut dins leûs mwins à l' voye dèdja si
 subtil.

I-z-ont d' l'eûwe plins lès îs.

Oufti, lès pus grigneûs èt lès pus man.nèts
 p'tète

Riglatichenut d' vîre l' gamin si bèn ostèyî.
 (*S'cuzèz-m' Victor ?*)

*

LI RWÈ FAÏT SÈS PAKÈTS.

Il arive co à voye lès coleûrs. Dès
 rimembrances di coloriâdjès. C' n' èst nèn
 on choûteûs. I tûze tot è z-imaudjes... c' è-
 st-on pinte... qui n' si sièrviréve mây qu' d'
 ène mërseûle tinte. (*Au rwè.*) Rinoncèz à
 vosse impîre. Rinoncèz èto auzès coleûrs.
 Ça vos va co piède, ça vos rastaudje. Vos
 n' vos plèz pus astaurdji, vos n' vos plèz pu
 vos djoker, vos n' è l' polèz pus pont. (*Èle è
 va pus lon.*) Rotèz tot seû, i n' vos faut nèn
 awè peû. Alèz-î. (*D' au lon, Mardjo
 moustère au rwè li voye à chûre.*) I n' faît
 pus djoû, c' n' èst pus l' nût. I gn'a pus pont
 d' nût, i gn'a pus pont d' anûti. Lèyèz-vos
 mwinrner pa l' rowe qui toûne pa padvant
 vos. Nèl pièrdèz nèn dès îs, chûvèz-l', nèn
 d' asto, èle è-st-è flames, vos vos î rostirîz.
 Avancèz, dji ribaurre lès bouchnisses,
 riwaîtèz à vos. N' vos pokèz nèn conte l'
 ombrîre à vosse drwète... Glumiantès
 mwins, brèyaudès mwins, piteûs brès èt
 mwins, n' rivnèz nèn è n'èri, rissatchèz-vos.
 N' l' apicèz nèn oudobén dji vos tchofe !
 (*Au rwè.*) N' toûnez nèn vosse tièsse.
 Passèz à costé do trau à hâre, n' uchèz
 sogne do vî ûleû leû à ote... sès dints sont
 d' machî papî, i n' èczistèye nèn. (*Au leû.*)
 Leû, vos n' èstèz nèn là ! (*Au rwè.*) N'

uchèz nén pus sogne dès rats. I n' sont nén capâbes d' agnî vos ortières. (*Aus rats.*) Rats èt nwarès coloûtes, vos n' èczistèz pus ! (*Au rwè.*) N' vos lèyèz nén prinde pa l' êr si pitieû do bribeûs qui vos tind s' mwin. R'waitèz à l' vîye feûme qui raplike. N' purdèz nén l' vère plin d' eûwe qu' èle vos vout d'ner. Vos n' avoz nén l' pèpîye. (*A l' vîye feûme.*) I n' a pont dandjî d' bwâre, vîye feûme. I n' a nén swè. (*Au rwè.*) Gripèz padzeû l' baurîre... l' gros bègnon n' vos va nén spotchî, c' n' èst qu' ène idêye qui vos passe è l' tièsse. Vos plèz passer oute, passèz... Mins qu' nèni, lès fleûrs di pichoulis n' tchantenut nén, min.me si èles ont toûné sotes. Dj' avale leûs vwès, dji lès fait disparète ! N' prustèz nén l' orêye aus brûts d' eûwe do richot. Dji vos l' assûre, on n' l' ètind nén. C' n' èst nén in vrê richot, c' n' èst qu' ène èrzatz di vwè... Faussès vwès, taijèz-vos. (*Au rwè.*) Nèlu n' vos-uche. Sintèz, po l' dêrin còp, l' goût dèl fleûr èt tapèz-l' èvoye. Rovièz c' qu' èle pout sinte. Vos n' avèz pus rén à dire. A qui pôrîz co cauzer ? Oyi, c' èst çoulà, lèvèz vosse pîd, asteûre lèvèz l' ôte. Vos èstèz à l' passerèle, i n' vos faut nén awè peû qui l' tièsse vos toûne. (*Li rwè è-st-asto do trône.*) Tounèz-vos di m' costé. Riwètèz-m'. Riwètèz au truviè d' mi. Riwètèz m' mirwè sins pont d' imaudje, dimèrèz drwèt... Donèz-m' vos djambes, li drwète, l' cine di gôche. (*A fait qu' èle done sès ordes, li rwè rwèdi sès mimbes.*) Donèz-m' in dwèt, donèz-m' è deûs, trwès, quate, cink, lès dîj dwèts. Lèyèz-m' vosse drwèt brès, asteûre li gôche, vosse pwètrin.ne, vos deûs spales èt vosse bodène. (*Li rwè n' boudje pus, rwèd come ène postûre.*) Èt volà, l' vèyèz, vos èstèz moya, vosse keûr n' a pus dandjî d' co toker, pus lès pwin.nes di rèspirer. Ça valève-t-i d' vos cotaper come si v's' avîz dès spènes à vosse cu, ènn'don ? Asteûre, vos vos polèz mète à place. (*Èt l' gordène di s' bachî.*)

(*A l' après d' Ionesco, èt co !*)

